

Schnitzebänk vo de Schwarze 2008

Der Bock vorus, all hingedri,
wär nid blind folgt, isch nid derbi!
Si blööke all u nicke brav,
da si mir lieber die Schwarze...

Aber itz isch d'Stadt ja voll Polizei,
wo alli öpis gäg üs hei!
Denn bisch vermummt, treisch ä dunkle Rock,
de ghörsch de scho zum Schwarze Block.

Färn hei mir no der Blocher gha,
itz isch dä Sürmu nümme da!
Im Bundesrat – das isch ä lingge Trumpf –
Hockt itz derfür no ä siebte Schlumpf!

U der Murer seit: „Du Mörgeli,
ich mach mir ä bitz Sörgeli!
Itz simmer gäg alls, findet alles schlapp,
am Änd schaffet mir öis sälber ab!“

Drum Brunner Toni, s' muess itz si,
Itz schalt emal dis Hirni i!
Ja mit Tonis Gring isch das cheibe schwär:
We öpis läär isch isch's halt läär.

D' Martina Hingis hett bi Gott,
äs totals Tennisplatz-Verbot.
Sie heigi drum – es isch nid gloge –
Immer d' Linie inezoge.

Üse Stapi findt si Lohn chli Mutz,
pro Stadtbärner nid emal zwe Stutz!
Los Alex, wemes gnau wett näh,
müestisch du ja usegäh!

Der Jimmy Hofer, dä Matte-Lappi,
isch drum ideal als nöie Stapi.
Denn für dä Job, s'gseht jede i,
Muesch blöder als all ander si!

Mir schisse i d Gärten u lös la megge,
schiffe u chotze i jede Egge!
Fülle üs mit Bier der Gring:
Das isch z' Euro 08 – Fan – Training!

U d' Hayoz grabt im Bäregrabe,

laht d' Bäre frei a d' Aare abe.
Im alte Grabe macht z' Hayoz-Schätzli
Für d' Holland-Fans äs Campingplätzli.

Ä Cervelat ohni Darm
Isch wie ne Lüchter ohni Arm.
Wie nes Chueli ohni Muni
U wie der Sarkozy ohni Bruni!

Der 50% Sämi isch passé,
s' isch ä 0% Sämi, seit d' SVP.
Doch öb ä halbe oder gar ke Schmid,
dä Unterschied, dä merksch gar nid!

Der Tschäppät, pflotschnass bis uf d' Chnoche,
isch uf em Bundesplatz im Isch ibroche!
Ja für ihn isch's nomal guet abgloffte,
der Hügli sig schins glatt versoffte!

d' Dolly usem Edelpuff
isch stocksur u total muff.
Anstatt ihri Girls cho z' ficke,
gö all zum FC Thun ga kicke!

Am Concours Eurovision,
preicht der DJ Bobo nid e Ton!
Lieber als dä Bobo-Depp
Wäri üs der Schacher Sepp:

*Ig bi der Blocher Stöffeli, im ganze Land bekannt.
Bi mal äs Bundesrätli gsi u geng ä Querulant.
Und bin ig einisch nümme da
Und stah vor Gottes Thron,
de gang ig ou im Himmelrich i d' Opposition!*

*Ig bi der Ospel Märceci, im ganze Land bekannt.
Bi fröhner mal ä Bänker gsi, itz bin ig Spekulant.
Ig bschisse d' Kunde, wo ig cha, das liegt i mir Natur.
Und geits mir einisch nümme so guet,
gang ig nach Singapur!*

Itz längts, der Bahnhof liegt i Trümmer!
Itz längts, es wird z' Bärn immer schlimmer!
Itz längts! Itz längts! Äs längts itz dänk
Ou mit üsne Schnitzelbänk!
